

緬甸亡國時之兩名將

(吾)

疾風知勁草。亂世識忠臣。當夫緬甸國破種亡之際。雖有無數亡國士夫。甘事他人。然亦不無一二忠臣義士。抱甯為玉碎。毋為瓦全者。吾於當時得二人焉。卽緬名將班都拉與貌賴是也。班都拉嘗破比固。克暹羅。攻野人山。前後戰功甚多。及與英人戰。倉猝中彈身死。緬甸遂亡。英人從軍者。至今猶能言其勇。普羅美之戰。班都拉憤其火器不敵。親提死士三千。直突英軍。十盪十決。直至英提督喀母敗兒帳下。而所部已剩五百人。復突圍走。與大軍相失。走林中。英步兵五千追之。彈丸如雨。班都拉與所部下馬坐不動。英人疑已去。揮軍入林。班都拉與所部突起。短兵乘之。英人錯愕。槍不及發。所殺傷甚多。他援軍張兩翼蹙其後。英師大敗。失印兵三千。地營之法。卽班氏首創。而越南山西守黃宗炎效之。劉永福又效之。岑毓英則得之劉永福。今世多謂岑氏首創者。蓋班氏身死國亡。而名亦滅。哀哉。

貌賴亦緬甸統將。於緬甸亡國時。方守北部。以城降。英兵來則盡殺之。而率所部盡拔居民走野人山。開曠且耕牧以自給。英兵攻之。輒東西走避。道路既熟。所部又習於履險。往往伺英人已憊。輒潛掩之。奪輜重器械。英以大師來。而山深瘴重。不能久屯。乃引退。方是時。大理杜氏新滅。其餘衆多走依貌賴。聲勢大震。英人患之。許以封地如土司例。貌賴不可。會曾劾剛使英爭緬界。英欲以野人山畀中國。李鴻章尼之而止。緬王子某者。爲英虜久矣。英患貌賴。乃許立之而使圖焉。貌賴不知也。獵於野。猝與之遇。王子以逸出對。貌賴大哭。迎以歸。奉爲主。顧王子初無他技。惟好遊獵而已。一夕。與貌賴並轡歷諸營。因踏月行獵稍遠。王子懷中出笛吹之。英精兵百人猝自草中出。遂繫以歸。英督訊之。貌賴左顧見王子。怒呼曰。他人擒我邀功。王亦謀我何耶。憤甚。熱血自喉湧出。一噴而死。自是北緬甸之義師盡散。英人竟背約。盡遷王族於錫蘭。緬人至今哀之。